

**Uunga siunnersuut: Pilersaarusiorneq aamma nunaminertat atorneqartarnerat pillugit  
Inatsisartut inatsisaata allangortinneqarnissaa pillugu Inatsisartut inatsisaat  
Aningaasaqarnermut akileraartarnermullu Naalakkersuisoq**

**pillugu**

**Sanaartornermut Ataatsimiititaliap**

**Siunnersuutip aappassaaneerpeqarneranut**

**ISUMALIUTISSIISUTAA**

Inatsisartunut ilaasortaq Kristian Jeremiassen, Inuit Ataqtigiit, Siulittaasoq  
Inatsisartunut ilaasortaq Bentiaaraq Ottosen, Atassut, Atassut, siulittaasup tullia  
Inatsisartunut ilaasortaq Harald Bianco, Inuit Ataqtigiit  
Inatsisartunut ilaasortaq Jens Kristian Therkelsen, Siumut  
Inatsisartunut ilaasortaq Lars Poulsen, Siumut

UKA 2022-imi ulloq 3. oktober siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Siunnersuummi matumani pilersaarusiorneq aamma nunaminertat atorneqartarnerat pillugit Inatsisartut inatsisaata allangortinnissaa pillugu Inatsisartut Inatsisaat (matuma kingorna Pilersaarusiornermut inatsit), inuiaqtigiit ineriartornerat peqatigalugu Pilersaarusiornermut inatsit nutarterneqarnissaa Naalakkersuisunit kissaatigineqarpoq. Pilersaarusiornermut inatsit nunatsinni sanaartorfissanik pilersaarusiornermut sinaakkutaavoq. Siunnersuuteqartup oqarneratut, inatsisip nutarternissaa namminersorlutik inuussutissarsiortuniit, politikeriniit, pisortani oqartussaniit innuttaasuniillu sivisuumik ujartorneqarpoq, maannami inatsit atuuttoq arlalitsigut pisoqalivoq.

Ineriartornermut illuutinullu aalaakkaasunut aningaasaliinissamat sinaakkutit pitsaasuunissaat patajaatsuunissaasalu siunersuummi qulakkearniarneqarpoq, piujuartitsisumik ineriartornermik tapersersuinissamik, siunissami illuutinik pilersaarusiornerep nunaminertanillu aqutsinerup digitalinngorsaanerup tunngavissaqarnissaa malittarisassanillu pisariillisaanissaq inatsisissatut siunnersuummi siunertarineqarpoq.

**Siunnersuutip Inatsisartunit siullermeerneqarnera**

Siunnersuut siullermeerneqarnerani amerlanerussuteqartunit taparserneqarpoq. Ikinnerussuteqartunit siunnersuutip itigartitsissutigineqarnissaa kaammattuutigineqarpoq.

**Tusarniaanermi akissutit**

Tusarniaanermi akissutit siunnersuummut ilanngunneqarput, tamanna Inatsisartut Siulittaasoqarfianit ilusissatut piumasaaqatitut naapertuuppoq.

Siunnersuut piffissami 15. Junimiit 14. julimut Naalakkersuisut nittartagaanni tusarniaassutigineqarpoq.

Tusarniaanermi akissutit tiguneqartut oqaluserineqarput tusarniaarnermilu akissutigineqartut allakkiamik suliaqartoqarluni tusarniaanermi akissutit tiguneqartut attuumassuteqartut ilanngunneqarput.

**Ataatsimiititaliap siunnersuummik suliarinninnera**

Immikkoortup suliarineqarnerani ataatsimut isigalugu inersuarmi oqallisigilluarneqartoq ataatsimiititaliamit maluginiarneqarpoq.

Aallarniutigalugu malugeqquneqassaaq ataatsimiititaliaq siunnersuutip annertunerpaartaanut isumaqataammat, soorlu nunaminertanik atugassiinermi malittarisassanik pisariinnerulersitsiniartoqarnera pitsaasuusoq. Naalakkersuisunit nunatsinni nunamik piginnittoqartannginnissaanik periutsip atuutsinnarneqarnissaa aalajangiusimaneqarmat kommunit suliniutinut qinnuteqartarnerminni ersarinnerusumik aalajangersagaqarnissaanik kissaateqarnerat malinneqarmat taamatuttaaq ataatsimiititaliamit pitsaasutut isigineqarpoq.

Siullermeerinninnermi digitalinngorsaanerup tunngaviumillu paasissutissanut programip annertusiartortinneqarnerata siunertamut tulluuttuunersaq apeqquserneqarpoq. Tunngaviumik paasissutissanut programi atorlugu nunaminertanut tunngatillugu tunngaviumik paasissutissanut aammalu aqutsinissamut periaatsit annertuumik digitaliseeriinermut nuna tamakkerlugu nalunaarsuiffissatut sakkussat pilersinneqassat Naalakkersuisunit ilisimatitsissutigineqarpoq. Piffiit innuttaasullu digitaliseeriinermut sakkunik atuinissamut tamarmik periarfissagissaarneq ajormata tamanna eqqarsaatigineqartariaqartoq ataatsimiititaliamit pingaartinneqarpoq. Naalakkersuisut ajornartorsiut isummerfigissagaat ataatsimiititaliamit qinnuigineqarput.

Tassunga ilanngullugu periutsinik malittarisassanillu taakkuninnga innuttaasut ilisimasaqalernissaat siunertaralugu Naalakkersuisut innuttaasunik sukumiisumik paasititsiniaanermik ingerlatsinissaat pingaaruteqarluinnartoq aammattaaq ataatsimiititaliaq isumaqarpoq.

Siunnersuummi matumani Naalagaaffiit peqatigiit nunarsuaq tamakkerlugu pijuartitsilluni ineriartortitsinissaq aallaavigineqarmat ataatsimiititaliamittaaq maluginiarneqarpoq. Naalagaaffiit peqatigiit nunarsuaq tamakkerlugu pijuartitsilluni ineriartortitsinissamik

anguniagaasa ilanngunneqarnissai assigiinngitsunik isummerfigineqarnera, tassungalu atatillugu piujuartitsilluni ineriartortitsineq kalaallit nunaanni atorneqarnissaa apeqquserneqarmat ataatsimiititaliamit maluginiarneqarpoq. Ataatsimiititaliarli isumaqarpoq killiliussat iluanni piujuartitsinissamik ineriartortitsinerup killilersuutaanani siuarsarneqarnissaata inatsisiliunneqarnissaa siunertamut tulluuttusoq.

Eqqissisimatitat aamma imaluunniit illut aserfallassimasut illoqarfimmilu inissamik tiguisut ajornartorsiutaanerat pillugit Naalackersuisunit isummerfigineqassasut ataatsimiititaliamit kissaatigineqarpoq. Nunaminertat tamakkua qanoq iliornikkut eqaannerusumik atorneqarsinnaanngortinneqarsinnaanissaat ataatsimiititaliamit paaserusunneqarpoq. Kommunit annertunerusumik pisinnaatitaaffilerneqarnerisigut tamanna pisinnaagalarpoq.

Illoqarfinni nunaminertanik atugassiinermi isikkivik inissisimaffillu akitigut sunniteqarsinnaasarneri Naalackersuisunit isummerfigineqassasoq aamma ataatsimiititaliamit kissaatigineqarpoq.

Siullermeerinninnermi Aningaasaqarnermut Akileraartarnermut Naalackersuisup inaarutaasumik oqaaseqarnermini innuttaasunut 500-junut killiliisarnerup nikisinneqartarsinnaanera, takuuk siunnersuutip § 21, imm. 3 aamma 4, erseqqissaraa, naggataatigut ataatsimiititaliamit maluginiarneqarpoq. Aalajangersagaq taanna inoqarfiup angissusaanut tunngatillugu pilersaarusiordermi nunaminertanik atugassiinermilu assigiinngisitaartuunissamik piumasaaqatitut tunngassuteqarpoq. Tamanna ataatsimiititaliamit tusaatissatut tiguneqarpoq.

### **Siunnersuutip aningaasatigut kingunerisassai**

Siunnersuutip piviusunngortinneqarnerani aningaasatigut kingunerisassai siunnersuummut nalinginnaasumik nassuiaatini allaaserineqarput. Ataatsimiititaliaq tassunga oqaaseqaatissaqanngilaq.

**Ataatsimiititaliap inassuteqaatai:**

Ataatsimiititaliami **amerlanerussuteqartut** Inuit Ataqtigiit aamma Siumut siunnersuutip akuersissutigineqarnissaa inassutigaat

**Ikinnerussuteqartut** Atassut siunnersuutip itigartitsissutigineqarnissaa inassutigaat tulliuttullu ikinnerussuteqartutut oqaaseqaatigaat:

“Naalakkersuisut sanaartorneq pillugu piujuaanartitsinissamik siunnersuuteqartut ilisimavagut, tamatumuunalu inatsisissaq pillugu nassuiaammi allaqqasoq aallaavigalugu Naalagaaffiit Peqatigiit nunarsuaq tamakkerlugu anguniagaasa piviusunngortinnissaanut siunnersuut imaqarmat inooqataaffigisinnaanagu itigartitsissuteqarniarluta. Paris-imut isumaqtigiisummut Kalaallit Nunaat ilanngunnissaanut aqqudit siullertut taaneqarsinnaasumik nassuiaatit imaqarnerat mianersorfigisariaqarparput,

Sanaartornikkut atortut aamma atortussiat akiisa qaffannissaat mianersorfigisariaqarparput, tamatuminngalu inatsisissatut nassuiaammi uannga pineqartumi Naalagaaffiit Peqatigiit nunarsuaq tamakkerlugu anguniagaat eqqunneqarpat qularnanngitsumik sanaartornikkut atortussat aamma atortussiat qaffannissaat qulakkeerqartussaasammat.”

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappasaaniigassanngortippaa.

---

Kristian Jeremiassen  
Siulittaasoq

---

Bentiaraq Ottosen  
Siulittaasup tullia

---

Harald Bianco

---

Jens Kristian Therkelsen

---

Lars Poulsen